

四庫全書

史部

欽定四庫全書

欽定續文獻通考卷五十

學校考

郡國鄉黨之學

宋寧宗嘉定中知崇安縣趙崇本捐俸興學校請買開平廢寺田以充學廩又請佃西林興福二寺廢租以折納餘羨助養士之費

時趙彥啟監青龍鎮稅務重建鎮學以養士百里之

間絃誦相聞理宗嘉熙元年知桐廬縣趙汝鏜發縣帑五千緡置學養士淳祐元年王泌知睦州修州學行鄉飲新釣臺書院景定初王鏜任江寧縣知縣縣舊無學時值諸學置官鏜慨然曰有師無學非所以稱上旨即建學於縣廨之北又置田若干畝以備學之廩粟焉

兵部侍郎虞儔上奏曰朝廷興太學置明師四方之士于于然而來可謂盛矣竊怪夫近年州郡之

學往往多就廢壞士子游學非圖哺啜以給朝夕
則假衣冠以誑流俗而鄉里之自好者過其門而
不入為教授者則自以為冷官而不事事自一郡
觀之若未甚害也舉天下皆然則實闕事體矣臣
嘗究其所以然蓋人之常情莫不以仕進為榮選
人之外者所望不過闕升與夫改秩而已向也
太守監司所發舉狀先及教授今則且以為贅員
置而不問雖有提學司文字專舉教官而員數又

甚窄向也教官在法得就任改秩今則莫之許也
是以有不屑就之心故不能所不樂為之事無足
怪者夫朝廷建一官蓋欲使之治一職苟以為迂
闊於事無補於時曷不一舉而廢之吏祿學糧猶
可省也若以為化民成俗長育人材自學校始祖
宗以來莫之有改奈何使之名存而實亡乎教官
自堂除之外在部格法非會試中詞科及學官殿
試第一甲者試上舍十名前等人不許差注蓋立

法之初重其選也如此今選人到部縱使有格多不肯就至與之堂除亦不滿意又就試者絕無一人而干堂者日以猥衆上而架閣非有所擢用則不可得次而幹官非特降指揮則不可差伺候日月之久廟堂無闕以處之未免有淹滯之嘆今若朝廷稍重教官之選有以作新之使其知所歆羨則選人進取之路少寬而廟堂造化之權亦廣矣是一舉而兩得之也

理宗淳祐六年勅湖廣善化縣別建湘西書院

潭州故有嶽麓書院至是御書其額賜之復於湘水
西別建書院州學生月試積分高等升湘西嶽麓書
院生又積分高等升嶽麓精舍生潭人謂為三學生
宋自白鹿石鼓應天嶽麓四書院後日增月益書院
之建所在有之寧宗開禧中則衡山有南嶽書院掌
教有官育士有田略倣四書院之制嘉定中則涪州
有北嶽書院至理宗時尤夥其得請於朝或賜額或

賜御書及間有設官者應天有明道書院蘇州有鶴
山書院丹陽有丹陽書院太平有天門書院徽州有
紫陽書院建陽有考亭書院廬峰書院崇安有武夷
書院金華有麗澤書院寧波有甬東書院衢州有柯
山書院紹興有稽山書院黃州有河東書院丹徒道
州有濂溪書院興化有涵江書院桂林有宣成書院
全州有清湘書院度宗朝則淳安有石峽書院衢州
有清獻書院其他名賢戾止士大夫講學之所自為

建置者不與焉

王圻續通考曰按諸本以淮海列四大書院之中
蓋以淮海書院在丹徒疑即應天書院也不知宋
之應天書院乃在歸德府亦或以睢陽名之人以
其字之相近遂以睢陽為淮海非矣又玉海所謂
四大書院者有嵩陽而無石鼓今當以玉海為正
臣等謹按馬端臨所載四書院曰白鹿洞曰石鼓
曰應天曰嶽麓而無嵩陽且言嵩陽後來無聞獨

四書院之名著而石鼓復不詳其建置攷高陽書院在河南登封縣太室山下五代時建宋太宗至道元年七月賜額及印本九經書疏三年五月河南言甘露降書院講堂上真宗大中祥符三年四月復賜九經仁宗景祐二年九月王曾奏置學官賜田一頃則嵩陽自當在四大書院中又淮海書院者在丹徒縣治西宋南渡後淮士多寓京口因建書院為講學之所故名自後書院徧天下星羅

鱗次王圻謂其多尚虛名而實學荒矣

遼聖宗開泰元年十二月歸州言其居民本新羅所遷未習文字請設學以教許之

上年十二月始置歸寧二州至是遂設學

道宗清寧元年十二月詔設學養士頒五經傳疏置博士助教各一員

時五京黃龍興中二府及諸州縣皆有學其設官並同咸雍時太公鼎為良鄉令省徭役務農桑建孔子

廟學部民服化太康時耶律孟簡為高州觀察使修學校招生徒以循吏著

金太宗時歸德軍節度使持嘉暉建宋州學舍生徒肄業者復其身

世宗大定四年立諸路女直學

以女直大小字譯尚書頒行之擇明安穆昆內良家子弟為諸生諸路至三千人九年取其尤俊秀者百人至京師以編修官溫特赫吉達教之十三年以策

詩取士諸路始設女直府學以新進士為教授府州
學二十二中都上京呼爾哈率賓海蘭扶餘博索咸
平泰州臨潢北京冀州開州澧州西京東京蓋州隆
州東平益都河南陝西凡取府學生之制皆與詞賦
經義生同又定制每穆昆取二人若宗室每二十戶
內無願學者則取有物力家子弟年十三以上二十
以下者充凡會課三日作策論一道季月私試如漢
生制二十九年勅以女直進士提控其事具入官銜

章宗承安二年罷河南陝西女直學餘如舊至宣宗
興定元年御試策論進士帝覽程文恠其數少以問
宰臣對曰大定制隨處設學諸穆昆貢三人或二人
為生員贍以錢米至泰和中人例授地六十畝所給
既優故學者多今京師雖存府學而月給通寶五十
貫而已若於諸路總管府及有軍戶處置學養之庶
可加益京師府學已設六十人乞更增四十人中京
亳州京兆府並置學官於總府以穆昆內不隸軍籍

者為學生人界地四十畝漢學生在京者亦乞同此
餘州府仍舊制從之

十六年四月詔京府設學養士

凡十七處共千人初以嘗與廷試及宗室皇家袒免
以上親并得解舉人為之後增州學遂加五品以上
官曾任隨朝六品官之兄弟子孫餘官之兄弟子孫
曾經府薦者同境內舉人試補三之一經府薦及終
場免試者不得過二十人凡試補州府學生以提舉

學校學官主之曾得府薦及終場舉人皆免試凡經史註疏會課學規一同太學之制

詔立兗州學闕里廟宅子孫年十三以上入學不限數

二十九年

時章宗已即位

詔計州府戶口增養士之數

時上封事者乞興學校下尚書省集百官議戶部尚書鄧儼等謂唐太宗養士至八千人有宋兩學五千人今策論詞賦經義三科取士而太學所養止百六十人外京府或止十人天下僅及千人今若每州設

學專除教授月加考試每舉所取數多者賞其學官
月試定為三等籍之一歲中頻在上等者優復之不
率教行惡者黜之庶幾得人之道也帝從其議遂計
州府戶口於舊制京府十七處千人之外置節鎮防
禦刺史州學六十處增養千人各設教授一員選五
舉終場或進士年五十以上者為之府學二十有四
學生九百五人

大興開封平陽真定東平府各六十人太原益都府各五十人大定河間

濟南大名京兆府各四十人遼陽彰德府各三十人河中慶陽臨洮河南府各二十五人鳳翔平涼延安

咸平廣寧興中
府各二十人
節鎮學三十九六百一十五人
絳定衛懷

滄州各三十人
萊密洛汾冀邢兗州各二十五人
代同邠州各二十人
奉聖州十五人
餘二十三
節鎮皆

十人
防禦州學二十一
二百三十五人
博德洛棣亮各十五人
餘十六

州各十人
凡千八百人
其長貳官各以進士提控其事至

承安四年八月詔諸路學校生徒少者罷教官止以

本州府文資官提控

臣等謹按金史選舉志所載養士之數二十四府
散數較總數少二十五人三十九節鎮散數較總

數多十五人合三總數與大總數千八百人較又少四十五人疑有脫誤

宣宗興定元年二月尚書省請罷州府學生廩給不許自章宗泰和元年九月定膳學養士法生員給民佃官田人六十畝歲支粟三十石至是省臣以軍儲不足請罷之帝曰自古文武並用向在中都設學養士猶未嘗廢況今日乎其令仍舊給之

元世祖中統二年九月詔立諸路提舉學校官凡諸生

進修者嚴加訓誨務使成材以備選用

時翰林學士承旨王鶚請於各路選委博學老儒一人提舉本路學校因立十道提舉學校官

立孔顏孟三氏學

置教授正錄各一員大司農姚樞請以儒人楊庸為教授從之乃詔曰孔氏顏孟之家皆聖賢之後也自兵亂以來往往失學甘為庸鄙朕甚閔焉今以進士楊庸教授孔顏孟三氏子弟其務嚴加訓誨精通經

術以繼聖賢之業

至元六年七月置諸路蒙古字學

十二月定制命諸路府官子弟入學上路二人下路
二人府一人州一人餘民間子弟上路三十人下路
二十五人願充生徒者與免一身雜役以蒙古字譯
寫通鑑節要頒行各路俾肄習之八年十二月詔天
下興起國字學十九年定路設教授國字在諸字之
右成宗元貞元年命有司割地給諸蒙古學生員餼

廩大德四年添設學正一員上自國學下自州縣舉
生員高等者從翰林院考試凡學官譯史取以充焉
五年十月又定生員散府二十人上中州十五人下
州十人

十九年四月命雲南諸路皆建學祀先聖

雲南俗無禮義子弟不知讀書且未知尊孔子祀王
逸少為師至元三年賽音諤德齊沙木斯鼎為雲南
行省平章創建孔子廟明倫堂購經史授學田十五

年張立道為忠慶路總管亦首建孔子廟置學舍勸士人子弟以學擇蜀士之賢者迎以為弟子師歲時率諸生行釋菜禮人習禮讓風俗稍變至是復有是命二十九年四月設雲南諸路學校其教官以蜀士充二十三年二月詔江南學校舊有學田復給之以養士時江南行省理財方急賣所在學田以價輸官利用監徹爾奉使至見之謂曰學有田所以供祭祀育人才也安可鬻遽止之還朝以聞帝嘉納焉至二十九

年正月詔江南州縣學田其歲入聽其自掌春秋釋奠外以廩給師生及士之無告者貢士莊田則令覈數入官

二十四年遷都北城詔以南城國子學為大都路學自提舉以下設官有差

時各道儒師悉以曠官罷浙西道儒學提舉葉李召至京師奏言先帝當創業時軍務繁夥尚招致士類今陛下混一區宇偃武修文可不作養人材以弘治

道各道儒學提舉及郡教授實風化所係不宜罷請
復立提舉司專令提調學官課諸生講明治道而上
其成材於太學以備錄用凡儒戶徭役乞一切蠲免
帝可其奏是年閏二月設江南各道儒學提舉司二
十六年九月置高麗國儒學提舉司至仁宗皇慶延
祐間遼陽甘肅四川雲南並置儒學提舉司

二十八年命江南諸路學及各縣學內設立小學選老
成之士教之其他先儒過化之地名賢經行之所好事

之家出錢粟贍學者並立為書院

凡儒師之命於朝廷者曰教授路府上中州置之命
於禮部及行省與宣慰司者曰學正山長學錄教諭
州縣及書院置之中原從禮部命各省從行省宣慰
命路設教授學正學錄各一員散府中上州設教授
一員下州設學正一員縣設教諭一員書院設山長
一員凡路州府書院設直學以掌錢穀從郡守及憲
府官試補考滿升學錄教諭諭錄升正長正長升教

授凡正長諭錄教授或由集賢院及臺憲等官舉充之教授之上各省設正副提舉各一員提舉學校之事其後直學考滿為州吏例以下第舉人充正長備榜舉人充諭錄有薦舉者亦叅用之自京學州縣學以及書院凡生徒之肄業於是者守令舉薦之臺憲考覈之或用為教官或為吏屬徃往人材輩出焉

自太宗八年行中書省事楊惟中從皇子庫春伐宋收集伊洛諸書送燕京立宋儒周敦頤祠建太極書

院延儒士趙復王粹等講授其間此元建書院之始
其後昌平有諫議書院河間有毛公書院景州有董
子書院京兆有魯齋書院開州有崇義書院宣府有
景賢書院蘇州有甫里書院文正書院文學書院松
江有石洞書院常州有龜山書院池州有齊山書院
婺源有明經書院太原有冠山書院濟南有閔子書
院曲阜有洙泗書院尼山書院東阿有野齋書院鳳
翔有岐陽書院郿縣有橫渠書院湖州有安定書院

東湖書院慈谿有慈湖書院寧波有鄞山書院處州
有美化書院台州有上蔡書院南昌有宗濂書院豐
城有貞文書院餘干有南溪書院安仁有錦江書院
永豐有陽豐書院武昌有南湖書院龍川書院長沙
有東岡書院喬岡書院益陽有慶州書院常德有沅
陽書院福州有勉齊書院同安有大同書院瓊州有
東坡書院凡此蓋約畧舉之不能盡載也

臣等謹按帝紀大司農司所上諸路學校之數至

元二十三年二萬一百六十六所二十五年二萬
四千四百餘所二十八年二萬一千三百餘所可
謂盛矣而學校卒未見起興明太祖謂其名存實
亡豈不信耶

成宗元貞元年五月詔各省止存儒學提舉司一餘悉
罷之

大德八年四月分教國子生於上都增置助教學正學
錄各二員

十一年五月

時武宗已即位

詔勉勵學校蠲儒戶差役

仁宗延祐四年閏正月詔學校為致治之本各肅政廉訪司及提調正官常加勉勵作成人材以備擢用

集賢修撰虞集上學校議畧曰師道立則善人多今天下教官猥以資格注授強加之諸生之上而名之曰師有司生徒皆莫之信如此而望師道之立可乎為今之計莫若使守令自求經明行修之士身師尊之以求其德化之及庶乎有所觀感也

其次則操履近正確守經義師說為衆所服者又其次則取鄉貢至京師罷歸者其議論文藝猶足以動人非若泛泛莫知根柢者矣

順帝元統二年二月詔內外興舉學校

時白景亮為衢州路總管郡學之政久弛從祀諸賢無塑像諸生無廩給祭物樂器有缺景亮皆為備之
儒風大振縉紳稱頌

明太祖洪武二年十月詔天下府州縣皆立學

時國子生至者甚衆帝銳意作興諭中書省臣曰古昔帝王育人材正風俗莫先於學校至元而其弊極矣上下波頽風靡學校雖設名存實亡兵亂以來人習戰鬥惟事干戈莫識俎豆欲興化何由今朕統一天下雖內設國子監恐不足盡延天下之英俊其令天下郡縣並建學校延師儒招生徒講道論德以復先王之舊於是府學設教授一員訓導四員州設學正一員訓導三員縣設教諭一員訓導三員生員府

學四十人州縣以次減十仍免其家差徭二丁生員專治一經以禮樂射御書數設科分教務求實材頑不率者黜之

七年正月設孔顏孟三氏教授司

置教授學錄學司各一員令三氏子孫入學習禮至宣宗宣德中詔三氏教授司學錄保仕孔氏一人英宗天順中給三氏教授印開生員歲格世宗嘉靖九年六月山東巡撫劉節請以曲阜縣治立四塾十六

社各立一塾簡孔氏生員儒士二十人為塾師凡孔顏孟三氏子弟八歲以上俱送塾教習并十五以上提學官試其學業有成送入三氏學而黜其累試無成者仍立為廩膳增廣附學名目其廩膳以提學官考定高下收補不支餼廩至於應貢以收補名次為定如年至五十累考無進者發回衣巾終身詔從所請其廩增人數視州學例各三十名神宗萬曆十五年又益以曾氏改鑄四氏學印給之四十一年四月

加四氏學廩增附如府學制

八年正月詔天下立社學

詔曰昔成周之世家有塾黨有庠故民無不知學是以教化行而風俗美今京師及郡縣皆有學而鄉社之民未覩教化有司其更置社學延師儒以教民間子弟導民善俗稱朕意焉於是鄉社皆置學令民間子弟兼讀御製大誥及本朝律令二十年令社學子弟讀誥律者赴京禮部較其所誦多寡次第給賞英

宗正統元年詔有俊秀向學者許補儒學生員孝宗
弘治十七年令各府州縣訪保明師民間幼童年十
五以下者送社讀書講習冠婚喪祭之禮法寢廢不
行

十五年四月賜學糧增師生廩膳

初制師生月廩食米人六斗有司給以魚肉學官月
俸有差至是命凡府州縣田租入官者悉歸於學俾
供祭祀及師生餽廩仍定為三等府學一千石州學

八百石縣學六百石應天府學一千六百石各設吏一人以司出納師生月給廩膳米一石教官俸如舊五月頒禁例於天下學校鐫勒卧碑置明倫堂左不遵者以違制論

卧碑禁例一府州縣生員有大事干已者許父兄弟陳訴非大事毋輕至公門一生員父母欲行非為必再三懇告不陷父母於危亡一切軍門利病農工商賈皆可言之惟生員不許建言一生員學優才贍

年及三十願出仕者提調正官奏聞考試錄用一
生員聽師講說毋恃已長妄行辨難或置之不問一師
長當竭誠訓導愚蒙毋致懈惰一提調正官務常加
考校敦厚勤敏者進之懈怠頑詐者斥之一在野賢
人有練達治體敷陳王道者許所在有司給引赴京
陳奏不許在家實封入遞至二十五年又定禮射書
數之法一頒行經史律誥禮儀等書生員皆須熟讀
精通以備科貢考試一朔望習射於射圃樹鵠置射

位初三十步加至九十步每耦二人各挾四矢以次相繼長官主射射畢中的飲三爵中采二爵一習書依名人法帖日五百字一數學務精通九章之法

十七年十一月立遼東諸衛學

諭禮部曰近命遼東立學校或言邊境不必建立夫聖人之教猶天也天有風雨霜露無所不施聖人之教亦無往不行昔箕子居朝鮮施八條之約故男遵禮義女尚貞信管寧居遼東講詩書陳俎豆飾威儀

明禮讓而民化其德曾謂邊境之民不可以教乎夫越與魯相去甚遠使越人而居魯久則必魯多魯人而居越久則必越多非人性有魯越之異風俗所移然也況武臣子弟久居邊境鮮聞禮教恐漸移其性今使之誦詩書習禮義非但可以造就其才他日亦可資用自後各衛以次皆設學宣宗宣德七年令衛所官舍軍餘俊秀者許入附近府州縣學聽本處鄉試景帝景泰三年許各處軍生考補廩膳照例科貢

憲宗成化三年定軍生入學之例四衛以上軍生八十人三衛以上六十人二衛一衛四十人有司儒學軍生二十人武宗正德十年命凡都司衛所學原定一年一貢者許設優等次等生員各四十名原定三年二貢者各三十名二年一貢者各二十名通行提學官考補以後於優等內選取充貢有多餘者俱作附學

二十四年十月定生員巾服之制

帝以學校為國儲才而士子巾服無異吏胥宜有以甄別之命工部製式以進帝親視必求典雅凡三易其制始定

二十六年定學官考課法以科舉為殿最

初教官考滿兼覈其歲貢生員之數至是以歲貢為學校常例復定制九年任滿核其學生員科舉中式府九人州六人縣三人者為最又教官自試通經即與升遷中式少者為平等即考通經亦不遷中式至

少及全無者為殿又考不通經則黜降之

成祖永樂元年五月立順天府學

時改北平為順天府禮部言舊制應天府設學不設
上元江寧二縣學今既設北京國子監以向日府學
為之宜草大興宛平二縣學而以大興學為順天府
學其舊府學及大興宛平二縣學生徒通經能文者
令充北京國子監生餘並充順天府學生從之

宣宗宣德元年定增廣生員額

洪武初生員雖定額至二十年即命增廣不拘額數至是定制在京府學六十人在外府學四十人州三十人縣二十人於是初設食廩者謂之廩膳生員增廣者謂之增廣生員英宗正統十二年鳳陽府知府楊瓚言民間子弟可造者衆宜增置生員毋限額帝採瓚言令於額外增取附於諸生之末謂之附學生員凡初入學者皆謂之附學廩膳增廣則以歲科兩試等第高者補充之非廩生久次者不得充歲貢天

順六年令廩膳缺於增廣內考補孝宗弘治七年始
命廩膳缺不得以別學增廣調補其未入學者通謂
之童生當大比之年間收一二異敏三場並通者俾
與諸生一體入場謂之充場儒士中式即為舉人不
中式仍候提學官歲試合格乃準入學世宗嘉靖十
年令天下沙汰生員以御史楊宜爭而止神宗萬厯
初張居正當國復建議核減提學官奉行太過童生
入學有一州縣僅錄一人者

日知錄曰明初諸生無不廩食於學其後以多材之地許令增廣亦不過三人五人而已踵而漸多於是宣德元年定為之額如廩生之數其後又有軍民子弟俊秀待補增廣之名久之乃號曰附學無常額而學校自此濫矣

英宗正統元年五月始置提調學校官

初生員入學從巡按御史布按兩司及府州縣官選取至是戶部尚書黃福言比來生員學業疎淺宜令

專官編厯考試庶得真才於是南北直隸各置御史
一員餘置按察司副使或僉事一員專督學校景帝
景泰元年罷英宗天順六年復設各賜勅諭十六條
俾奉行之其後因提學有所轄太廣及地最僻遠歲
巡所不能及者乃以口外及各都司衛所土官屬各
道分巡官以南直隸廬鳳淮揚滁徐和屬江北巡按
湖廣衡永郴屬湖南道辰靖屬辰沅道廣東瓊州屬
海南道甘肅衛所屬陝西巡按亦皆專勅行事神宗

萬曆四十一年南直隸分上下江湖廣分南北復各增提學一員提學官在任三歲兩試諸生先以六等試諸生優劣謂之歲考一等前列者視廩膳生有缺依次充補其次補增廣生一二等皆給賞三等如常四等朴責五等則廩增遞降一等附生降為青衣六等黜革繼取一二等為科舉生員俾應鄉試謂之科考其充補廩增給賞悉如歲試其等第仍分為六大抵多置三等三等不得應鄉試其生儒應試每舉人

一名以科舉三十名為率舉人屢廣額科舉之數亦日增凡考試及事關學校者皆提學官主之不理刑名所受詞訟重者送按察司輕者發有司直隸則轉送巡按御史督撫巡按及布按二司亦不許侵提學職事

十四年申明生員黜罰之制

先是太祖洪武二十四年七月詔歲貢生員不中其廩食五年者罰為吏不及五年者遣還讀書次年復

不中者雖未及五年亦罰為吏二十七年十月詔生
員食廩十年學無成效增廣二十年不通理義者罰
為吏成祖永樂二年詔增廣生員入學十年若年二
十以上魯鈍不能行文者充吏宣宗宣德三年三月
勅各處巡按御史會布按二司各官公同考試生員
食廩膳七年以上學無成效者發充吏六年以下追
還所給廩米黜為民正統元年令廩膳六年以上不
諳文理者充吏增廣為民至是申明其制而稍更之

廩膳受贓奸盜冒籍及諸所犯事理重者直隸發充
國子監膳夫各省充附近儒學膳夫齋夫滿日為民
俱追廩米犯輕充吏者免追

憲宗成化三年詔提學官躬歷各學督率教官化導諸
生

先是英宗正統六年令提調官置簿稽考生員所業
提學官所至察提調勤怠以書其稱否生員不率教
者黜退之至是令仍置簿考驗其德行優文藝贍治

事長者列上等簿或有德行而劣於經義或有經義而短於治事者列二等簿經義雖優治事雖長而德行或缺者列三等簿歲課月考循序而上非上等不許科貢

明史選舉志曰明初優禮師儒然鉗束亦甚謹其後教官之降黜生員之謫發皆廢格不行即卧碑亦具文矣諸生上者中式次者廩生年久充貢或選拔為貢生其累試不第年踰五十願告退間者

給與冠帶仍復其身有親老願告侍養者聽親終
復學其後有納粟馬捐監之例則諸生又有援例
而出學者矣提學官歲試校文之外令教官舉諸
生行優劣者一二人賞黜之以為勸懲此其大較
也

春明夢餘錄曰明初重督學之選其盛時無論迨
正德末御史蕭鳴鳳懲惡嚴雖才不貸副使魏校
敦行急受欺不悔副使李夢陽伸士節振姜習士

誦義不休其後督學官稍輕柄其任者非必有卓
行實學厭士心如曩時高者虛談沽譽劣者安祿
養交下者至開倖門聽請託不忌又巡歷二三歲
乃一至至不過浹旬月獨品所為校試一日文而
止不復闕行能考察他道藝即甄考德行亦徒按
郡縣學官所報三等簿獎汰之不復有案質甚乃
憚巡行勞苦獨高坐引日月至大比獨委府州縣
類考而合試之故士習利而人驚於奔走

十七年詔凡土官嫡子許入附近儒學

至世宗嘉靖二十六年命歸順土官子孫照例送學
食廩讀書神宗萬厯四年詔廣西雲南四川凡改土
為流州縣及土官地方建有學校者提學官嚴加查
核果係土著之人方准考充附學不許他處士民冒
籍濫入

世宗嘉靖十七年四月吏部尚書許讚請毀書院從之
初太祖因元之舊洪武元年立洙泗尼山二書院各

設山長一人憲宗成化二十年命江西貴溪縣重建
象山書院孝宗弘治元年以吏部郎中周木言修江
南常熟縣學道書院武宗正德元年江西按察司副
使邵寶奏修德化縣濂溪書院其時各省皆有書院
弗禁也至帝十六年二月御史游居敬疏斥南京吏
部尚書湛若水倡其邪學廣收無賴私創書院乞戒
諭以正人心帝慰留若水而令所司毀其書院至是
讚復言撫按司府多建書院聚生徒供億科擾宜

撤毀詔從其言神宗萬厯十年閣臣張居正以言官之請槩行京省查革然亦不能盡撤後復稍稍建置其最著者京師有首善書院江南曰東林書院

孫國敕燕都遊覽志曰首善書院在宣武門內左方天啓初都御史鄒元標副都御史馮從吾為都人士講學之所大學士葉向高撰碑禮部尚書董其昌書黨禍起魏忠賢矯旨毀天下書院搥碎碑碣即其地開局修厯

春明夢餘錄曰京師有首善書院不知者統謂之東林當日直借東林以害諸君子耳蓋東林無錫書院名也宋儒楊時建後廢為僧寺萬厯中吏部考功郎顧憲成罷歸即其地建龜山祠同志者為構精舍居焉乃與行人高攀龍等開講其中及攀龍起為總憲疏發御史崔呈秀之贓呈秀遂父事魏忠賢日嗾忠賢曰東林欲殺我父子既而楊漣左光斗交章劾璫璫益信呈秀之言不虛也於是

遂首毀京師書院而天下之書院俱毀矣

神宗萬曆十五年禮部言文學日弊請以所選刊布學宮為士子式從之

明諸生應試之文通謂之舉業四書義一道二百字以上經義一道三百字以上取書旨明晰而已不尚華采其後標新領異益漓厥初至是禮部言唐文初尚靡麗而士趨浮薄宋文初尚鉤棘而人習險譎國初舉業有用六經語者其後引左傳國語矣又引史

記漢書矣史漢窮而用六子六子窮而用百家甚至
佛經道藏摘而用之流弊安窮弘治正德嘉靖初年
中式文字純正典雅宜選其尤者刊布學官俾知趨
向因取中式文字一百十餘篇奏請刊布以為準則
時方崇尚新奇厭薄先民矩矱以士子好尚為趨不
遵上指也啓禎之間文體益變以出入經史百氏為
高而恣軼者亦多矣雖數申詭異險僻之禁勢重難
返卒不能從

臣等謹按舉業之文代聖賢立言而士人之學問才識亦即於是乎見經史固其根柢也若如禮部之言則將使學者屏六經左國史漢於不觀而惟程文之是習毋怪乎坊刻盛行而學術日就於荒陋人才日即於銷耗也

愍帝崇禎六年二月申嚴學校之制

諭曰近來士習日偷舉貢失當真才鮮少理道不張皆由督學教諭訓導各官董率乖方培養無術盡失

舊制初意以致朝廷不獲收用人之效據會典及提
學勅書內敦尚行誼以勵頽俗不專論文優劣開載
甚明近日通不遵行至小學諸書州縣各有社學原
欲養蒙育德敷教儲才近亦全不講論興舉教官為
士子師長化導最親舊制甚重近皆以衰庸充數教
術全廢此尤士風不正之源今宜設法興起吏禮二
部同都察院等詳議明確以聞

禮部尚書黃汝良議曰古者家有塾黨有庠州有

序國有學循序漸進無非先勗以六德六行而後
及六藝故曰行有餘力則以學文今之教者自少
至長自長至壯所學習者皆佔畢文藝之事所經
營者皆富貴溫飽之圖一旦登第為官竟不知德
行為何物無怪其四維不張而百事決裂也合無
勅下臣部劄行各省直學臣刊為條教頒下府縣
塾師俱籍名於官有能以孝經小學教育童蒙俾
之入孝出悌幾幾小子有造者塾師榮以衣巾其

子弟敗類而不戒戢者塾師有罰教官有能以規矩準繩表率子衿俾之飭躬勵行斌斌成人有德者教官注以上考其生童入試須令州縣教官各取保結無過犯方准進場有敗倫而失簡舉者教官與州縣官有罰至於提學一官尤為宣上率下機要必於文字外加意作興其諸生行誼著聞文雖平加以優等素行薄劣文雖工黜革示懲實能奉行勅書者查覆紀錄如彰瘡不明勸懲無法提

學官有罰如此庶幾士風可挽風習可祛矣

袁黃曰學校者國家所以育英才者也在內總之以司成在外督之以憲臣可謂重其事矣然所學者皆無用之文所謀者皆干澤之事而其應上之虛文如經義表判論策之詞率皆掇拾緒餘畧無心得以經義言之不攻體貼專尚浮詞逐靡鬬華自誇高調而凡所引用漠然不知來歷以表判言之鈔成四六顛倒鋪填或誤記而錯用或妄用而

強排以之陳情達意開刑擬罪無一相干論者所以發揮義理論列事情者也今則陳言塞白轉合成文策者所以折經史陳世務者也今則摘定名目鈔成活套一遇考試不對其所問而對其所不問畧過本題含糊遷就謂之凌駕問答之體固如是乎竊意此皆由朝廷不重教官之職故無以振作士風蓋今日教官多是歲貢挨揆而歲貢之條凡生員一食廩惟計年之久近年滿赴選又限以

資格故加意作興者少而蘇湖之風不復見也愚
按生員食廩係於憲臣之一考一時偶得豈盡賢
才奈何輕授以師儒之重任哉意欲將民間俊秀
通一經者入學試通二經者補增廣生試通三經
四經者補廩膳生試通五經者送入監一年一試
毋得弛廢如浙江一省限貢生四五十員此縣不
足足以他處如人才果乏不必求備到監當厚其
廩給仍遵太祖積分之例注官既注官仍聽科舉

雖數年升轉之後亦不禁惟以非禮去官始禁之
不拘入官未入官能以五經中鄉會試者選府教
授其州學正縣學教諭等以通四經以下科目出
身者選為之三年政成上者補翰林次者補郎屬
又次者補有司政未成六年再考之稱職依次升
入六年未成九年再考之稱職則陟不稱職則或
黜調凡入翰林者非通五經及博雅之士不可濫
進餘通四經以下一經以上中式者不拘教職京

職及雜職能復就試以五經中式亦聽脩翰林之選兩京外藩督學之臣即於翰林差出未經差者不得入經筵如此則教官之職重督學之選精而人知自愛士知向風矣

十年令天下府州縣學皆設武學生員提學官一體考取

已又申會典事例簿記功能有不次擢用黜退送操獎罰激厲之法時事方棘無所益也

欽定續文獻通考卷五十

欽定四庫全書

史部
欽定續文獻通考卷五十二

編修_臣 翟槐覆勘

總校官內閣中書_臣 孫溶

欽定四庫全書

欽定續文獻通考卷五十一

職官考

臣等謹按馬端臨作職官考首叙官制次叙官數

內官則自公師宰相而下外官則自州牧郡守而下以至散官祿秩品從之詳自唐虞迄於有宋其間因革損益之故尊卑輕重之殊曲暢旁通可以類考大抵宋代馭臣八柄舉無足觀其綜覈名實

有遠不及後代者紹熙已前備詳馬考慶元而降
更定無多遼初建置簡質其後因俗酌宜漸參唐
制分為北南面官以國制治契丹以漢制治漢人
而北面又自有北南二院治兵治民不相凌越以
至宮帳部族體統相承屬國邊防控制有術其定
制之初職守名稱與古雖別而規模度量迥乎不
侔矣惜史志闕畧一銜一職往往僅舉曾居是官
者以實之班品祿秩均莫得而詳焉金自太宗並

建三省其後天眷以及正隆疊頒官制定為省院
臺府司寺監局署所各有長屬職專而事舉章宗
而後考課加詳未嘗改革元自世祖即位命儒臣
討論古今參酌時變定內外官秩未幾混一區宇
一代鴻模燦焉大備然帝銳意富國好用言利之
臣以致歷成武二宗奸邪踵進尚書省竟為鈎考
財賦之地銓調不關白中書於是以官為市法紀
大壞且省院臺部寺監路府州縣設官視金時已

增數倍甚至一玉石之微一弓劍之細無不有數
官以董之名位冗雜前所未有明初制仍元之舊
設中書省既而裁革分其職於六部初置大學士
命翰林官充之以備顧問及洪熙宣德之間而閣
權漸重改樞密院為都督府分府為五軍而完其
樞要於兵部革行中書省平章參政等官立布政
按察二司統攝郡縣後以都御史為總督巡撫領
一省之紀綱以巡按御史糾察之法制相維內外

咸秩中葉而還寵任宦豎侵官司之職擅黜陟之
權國是潰敗而莫可振救由用人之失非立法之
不善也今自遼以下詳考史志以次臚載惟宋史
職官志即本於馬考第錄具有據者以補端臨所
未備其他紀傳及歷朝著錄有可採摘者亦文獻
所不遺槩從綴輯至於名實不符及一朝創置與
馬考所列門目難以類從者則變通舊例以庶幾
無漏無躐焉

官制

宋寧宗嘉定六年二月有司上嘉定編修吏部條法總類

理宗淳祐時右丞相杜範請撥堂除闕歸吏部

先是淳祐四年範拜右丞相上五事其三曰擇人材
謂當隨其所長用之而久於職毋徒守遷轉之常格
其四曰惜名器謂如文臣貼職武臣閣銜不當為徇
私市恩之地至是親王近戚多求降恩澤引前朝杜

衍例範皆封還乞撥堂除闕歸之吏部以清中書之
務惟留書庫架閣京教及要地幹官人皆以為不便
太學生亦上書言之帝以示範範奏曰三四十一年權
臣柄國以公朝爵祿而市私恩取吏部之闕以歸堂
除太學諸生亦習於見聞乃以近年之弊政為祖宗
之成法如以臣言為是上下堅守則謗者自息

臣等謹按王圻續通考官制總門載淳祐五年十
二月杜範入相首論事其五曰惜名器今考範傳

拜右丞相在淳祐四年所論惜名器為五事之四
圻本誤也又考宋史列傳吏部尚書許應龍上劄
亦極論當時用人之弊反覆數百言而不及範之
約而盡蓋嘉定後政出私門一時官制混淆可概
見矣

遼制分北南院及北南面設官

契丹舊俗事簡職專官制樸實太祖神冊六年詔正
頒爵天贊元年分德呼勒額爾奇木為北南二大王

謂之北南院宰相樞密宣徽林牙下至郎君護衛皆分北南北樞密視兵部南樞密視吏部北南二王視戶部伊勒希巴視刑部宣徽視工部多囉倫穆騰視禮部北南府宰相總之特哩袞治宗族林牙修文告于越坐而論議以象公師至太宗兼制中國官分南北北面治宮帳部族屬國之政南面治漢人州縣租賦軍馬之事

臣等謹按遼史百官志太祖分北南院其實所治

皆北面之事太宗則以國制治契丹以漢制待漢人故分為北南面所謂因俗而治也

又按太宗紀會同元年十一月升北南二院及伊實額爾奇木為王以主簿為令令為刺史刺史為節度使二部德爾吉為司徒達爾罕為副使瑪達布為縣令縣達爾罕為馬步置宣徽閣門使控鶴客省御史大夫中丞侍御判官文班牙署諸宮院世燭

世燭亦曰侍中

馬羣約尼世燭南北府國舅帳郎君

官為敝史諸部宰節度使帳為司空二室韋達林
為僕射鷹坊監治等局官長為詳袞是就北南二
院中又以國制漢制參用矣

北面有御帳著帳皇族帳諸帳官宮官坊場局治牧
廐等官軍官邊防官行軍官屬國官又有部屬官

御帳

官出於貴戚為侍衛著帳為近侍部族為護衛武臣
為宿衛親軍為禁衛百官番宿為宿直奉宸以司供
御三班以肅會朝硬寨以嚴晨夜著帳官以叛逆家
屬為之皇族帳官肅祖長子學順之族屬五院司叔
子噶拉季子轄哩及懿祖仲子塔拉季子尼固察之
族屬六院司此五房謂之二院皇族元祖伯子瑪魯

無後次子葉穆之後曰孟父房叔子舒嚕曰仲父房
季子為德祖德祖之元子是為太祖天皇帝謂之橫
帳次曰埒克曰達喇曰伊德實曰安端曰蘇皆曰季
父房此一帳三房謂之四帳皇族二院治之以北南
二王四帳治之以大內特哩袞皆統於大特哩袞司
諸帳官如約尼氏九帳渤海國族帳併奚王之衆存
其部帳之屬是也官官如諸官鄂爾多部族番戶皆
設官以統之坊場等官以理畜牧畋漁軍官則自官
帳部族以及京州屬國各自為軍邊防官東備高麗
南備梁唐晉漢周宋六代北拒準布珠巴克大國以
十數西制西夏黨項吐谷渾回鶻等強國以百數各
以時制行軍官則有樞密都統部署司以及先鋒兩
翼中軍探偵等員臨陣有監戰其職尤重屬國及部
屬官大者擬王封小者准部使以其酋長與契丹人
分別用之

臣等謹按遼史營衛志契丹故俗分地而居合族

而處

部落曰部氏族曰族

有族而部者五院六院之類是也

有部而族者奚王室韋之類是也有部而不族者

特哩特默刷哈準之類是也有族而不部者約尼

九帳皇族三父房是也先是始祖聶咿相約尼蘇

爾威汗分三耶律為七

曰達呼爾曰約尼曰錫里即皇族也

二審密

為五

曰伊蘇濟勒曰巴哩即國舅也

并前約尼氏八部

曰達爾扎曰伊斯琿

曰沙琿曰諾爾威曰丕勒摩曰訥古濟曰濟勒錦曰實衮而聶咿所統德咿勒部自為別部不與其

列并約尼亦十部也

為二十部契丹始大至於太祖析九帳

三房之族更列二十部

部名詳見後部族屬國官門

聖宗之世

分置十有六增置十有八

部名詳見後部族屬國官門

并舊為

五十四部設大小部族官以治之此遼世部屬之

崖畧也

南面有朝官京官方州官分司官財賦官軍官邊防

官

朝官如三省六部臺院寺監諸衛東宮官之屬京官統五京之官而言方州官冠以節度承以觀察

防禦團練等使分以刺史縣令就中宗室外戚大臣之家所攻下之地許自築城朝廷賜額謂之頭下州

軍得自置官屬惟節度使必由朝命後亦往往歸之王府不能州者謂之軍不能縣者謂之城不能城者謂之堡軍城以下設官未詳分司官主平理庶獄採撫民隱官不常設有詔則選才望官為之財賦官如北面官之有坊場局治軍官邊防官與北面並設其軍用南人而邊防尤重於南以其地大民衆也

臣等謹按百官志契丹自唐太宗置都督刺史武

后加以王封玄宗置經畧使始有唐官爵其後習聞河北藩鎮受唐官名於是太師太保司徒司空施於部族太祖因之大同元年世宗始置北院樞密使明年世宗以高勲為南院樞密則樞密之設

蓋自太宗入汴始天祿四年建政事省於是南面
官僚可得而書其始漢人樞密院兼尚書省吏兵
刑有承旨戶工有主事中書省兼禮部別有戶部
使司以營州之地加幽冀之半用是適足矣中葉
彌文耶律揚魯為太傅則有三師矣和爾果勃濟
為太尉則有三公矣韓古得為常侍劉涇為禮部
尚書則有門下尚書省矣於庫部虞部倉部員外
出使知備郎官列宿之員室昉監修知國史有院

程翥舍人知起居有注邢抱朴承旨王言敷學士
知有翰林內制張幹政事舍人知有中書外制大
理司農有卿國子少府有監九卿列監見矣金吾
千牛有大將十六列衛見矣太子工有師保下有府
率東宮備官也節度觀察防禦團練刺史咸在方州
如唐制也又云先有北面朝官矣既得燕代十有
六州乃用唐制復設南面所以招徠中國之人也
金太宗天會四年官制行詔中外

舍音宗幹當國始勸帝定官制立尚書省以下諸司
府寺

熙宗天眷元年八月頒行官制

自景祖始建官屬統諸部以專征伐巍然自為一國
其官長皆稱曰貝勒故太祖以達貝勒嗣位太宗以
安班貝勒居守其次曰古倫烏赫哩貝勒又有古
倫貝勒或左右置其次諸貝勒之上則有古倫英
實烏赫哩伊拉齊愛滿阿斯罕烏達之號以為升

拜宗室功臣之序焉其部長曰貝勒統數部者曰呼
嚕至是皆廢其後惟鎮撫邊民之官曰圖哩烏爾固
之下有繅袞圖依達詳袞之下有麼忽習尼昆此則
具於官制而不廢皆踵遼官名也

臣等謹按金史百官志漢官之制自平州人不樂
為明安穆昆之官始制長吏以下太祖天輔七年
以左企弓行樞密院於廣寧尚踵遼南院之舊天
會四年建尚書省遂有三省之制至熙宗頒新官

制及換官格除拜內外官始定勲封食邑入銜而後其制定然大率皆循遼宋之舊又金之用人不分本國及諸色人考帝紀熙宗皇統八年十一月左丞相宗賢等言州郡長吏當並用本國人帝曰四海之內皆朕臣子若分別待人豈能致一自今本國及諸色人量才通用宣宗貞祐元年詔應遷官諸色人與本朝人一體三年二月又詔有司妄生分別以違制論是也

皇統五年定長貳官名及行守試充等制

京府尹牧留守知州縣令詳袞羣牧為長官同知簽院副使少尹通判丞曰佐貳官判官推官掌書記主

簿縣尉為幕職官兵馬司及他司軍者曰軍職官警

巡市令錄事司候諸參軍知律勘事勘判為釐務官

應管倉庫院務者曰監當官

監當官出
大定志

知事孔目以

下行文書者為吏凡除拜尚書令左右丞相以下品

不同者則帶守字左右丞則帶行守字凡臺官御史

部官京尹少尹守令丞簿尉錄事諸卿少至協律評
事諫官國子監學官諸監至丞郎符寶郎東宮詹事
率府僕正副令丞王府官散官高於職事者帶行字
職事高於散官一品者帶守字二品者帶試字品同者
皆否明安穆昆翰林待制修撰判推勘事官都事典
事知事內承奉押班通事舍人通進編修勾當頓舍
部役廂官受給管勾巡河官直省直院長副諸檢法
知法司正教授司獄司候東宮諭德贊善掌寶典儀

以下王府文學記事叅軍並帶充字樞密宣徽勸農
諸軍都指揮統軍轉運使招討提刑節度羣牧防禦
客省引進四方館閣門太醫教坊鷹坊警巡巡檢諸
司局倉庫務使副皆帶充字及知某事凡帶知判簽
書字者則不帶行守試字以上所帶字品同者則否
自三師三公平章政事元帥以下至監軍東宮三師
三少點檢至振肅承旨學士王傅副統招討及前所
不載者皆不帶行守試知充字

海陵正隆元年五月頒行正隆官制

是年罷中書門下省止置尚書省自省而下官司之
別曰院曰臺曰府曰司曰寺曰監曰局曰署曰所各統
其屬以修其職職有定位員有常數終金之世守而
不變

章宗泰和四年定考課法准唐令作四善十七最之制
四善一曰德義有聞二曰清慎明著三曰公平可稱
四曰勤恪匪懈十七最一曰禮樂興行肅清所部為

政教之最二曰賦役均平田野加闢為牧民之最三
曰決斷不滯與奪當理為判事之最四曰鈐束吏卒
奸盜不滋為嚴明之最五曰案簿分明評擬均當為
檢校之最以上皆謂縣令丞簿警巡使副錄事司候
判官也六曰詳斷合宜咨執當理為幕職之最七曰
盜賊消弭使人安靜為巡捕之最八曰明於出納物
無損失為倉庫之最九曰訓導有方生徒充業為學
官之最十曰檢察有方行旅無滯為關津之最十一

曰隄防堅固備禦無虞為河防之最十二曰出納明
敏數無濫失為監督之最十三曰謹察禁囚輕重無
怨為獄官之最十四曰物價得實奸濫不行為市司
之最謂市令也十五曰戎器完肅扞守有方為邊防
之最謂正副部隊將鎮防官也十六曰議獄得情處
斷公平為法司之最十七曰差役均平盜賊止息為
軍職之最謂都軍都轄也凡縣令以下三最以上有
四善或三善者為上升一等三最以上有二善者為

中減兩資歷三最以上有一善為下減一資歷節度
判官防禦判官軍判以下一最而有四善或三善為
上減一資歷一最而有二善為中升為榜首一最而
有一善為下升本等首又以明昌四年所定軍民俱
稱為廉能者是為廉能官之制參於其間而定其甄
擢焉

元世祖至元六年詔定官制

先是太祖起自朔土統有其衆部落野處國俗淳厚

惟以萬戶統軍旅以斷事官治政刑任用者不過一二親貴重臣耳及取中原太宗始立十路宣課司選儒術用之金人來歸者因其故官若行省若元帥則以行省元帥授之草創之初固未暇為經久之規矣帝即位登用老成大新制作立朝議造都邑至是遂命劉秉忠許衡酌古今之宜定內外之官其總政務者曰中書省秉兵柄者曰樞密院司黜陟者曰御史臺體統既立其次在內者則有寺有監有衛有府在

外者則有行省行臺有宣慰司有廉訪司其牧民者則曰路曰府曰州曰縣官有常職位有常員其長則蒙古人爲之而漢人南人貳焉於是一代之制始備成宗大德以後承平日久靡文之習勝而質簡之意微僥倖之門多而方正之路塞官冗於上吏肆於下言事者屢疏論列而朝廷訖莫正之勢固然也大抵元之建官繁簡因乎時得失係乎人若其因事而置事已則罷與夫異教雜流世襲之屬名類實繁自元

統至元以後頗有沿革損益之異至正兵興四郊多
壘中書樞密俱有分省分院而行中書省行樞密院
增置之外亦有分省分院自省院以及郡縣又各有
添設之員而各處總兵官以便宜行事者承制擬授
具姓名以軍功奏聞則宣命勅牒隨所索而給之無
有考覈其實者於是名爵日濫矣

臣等謹按帝紀太祖十八年夏定西域諸城初置
達嚕噶齊監治之太宗三年八月始立中書省改侍

從官名考邵遠平續弘簡錄云太宗設官甚簡斷事

官曰扎爾古齊

世祖紀云至元九年二月詔扎爾古齊乃太祖開國所置位百司右

其賜銀印

立左右司任至重位三公上丞相謂之大筆且齊

掌兵柄則左右萬戶而已後稍倣金制置行省及元

帥宣撫等官是即志所謂草創之初未暇為經久

之規者也又云太宗二年十一月詔諸路州縣長

吏專理民事萬戶府專總軍政課稅所專掌錢穀

各不相統攝則太宗時已有諸路州縣等官矣又

云世祖中統元年四月初定官制考世祖紀是年
五月建元中統詔有曰內立都省以總宏綱外設
總司以平庶政殆即其所据耶若紀既載至元元
年八月詔新立條格省併州縣定官吏分品從官職給俸
祿頒公田計月日以考殿最矣又是年十二月罷各投下
達魯噶齊罷樞密院斷事官及各路鄂囉官二年二月以
蒙古人充各路達魯噶齊漢人充總管回回人充同知永
為定制

續弘簡錄云凡文案一同判行印
信聽達魯噶齊封識長官收掌

五年三月罷諸

路女直契丹漢人為達嚕噶齊者回回輝和爾奈
曼唐古人仍舊蓋數年內置罷不常突未有定制
故至是乃詔議中書省事許衡與太保劉秉忠左
丞張文謙定官制衡厯考古今分併統屬之序去
其權攝增置冗長側置者凡省部院臺郡縣與夫
后妃儲藩百司所聯屬統制俱定為圖次七年始
奏上之而一代之制始備三十年正月命中書汰
冗員凡省內外官府二百五十五所總六百六十

九員嗣後罷置則分見於各門

明官制沿漢唐之舊而損益之

明初立中書省以總天下之文治都督府以統天下之兵政御史臺以振朝廷之紀綱太祖即吳王位首建百官司時中書省惟設四部掌錢穀禮儀刑名營造之事洪武元年八月立六部以分理庶政十三年正月罷中書省廢丞相等官政歸六部以尚書任天下事侍郎貳之而殿閣大學士祇備顧問帝方自操

威柄學士鮮所參決其糾劾則責之都察院

十三年後罷御

史臺十五年更置都察院

章奏則達之通政司平反則叅之大理

寺是亦漢九卿之遺意也分大都督府為五而征調

隸於兵部外設都布按三司分隸兵刑錢穀而聽於

府部是時吏戶兵三部之權為重迨仁宣朝大學士

以太子經師恩累加至三孤望益尊而宣宗內柄無

大小悉下大學士楊士奇等參可否雖吏部蹇義戶

部夏原吉時召見得預各部事然希濶不敵士奇等

親自是內閣權日重即有一二吏兵之長與執持是非輒以敗至世宗中葉夏言嚴嵩迭用事遂赫然為真宰相壓制六卿矣然內閣之擬票不得不決於內監之批紅而相權轉歸之寺人於是朝廷之紀綱賢士大夫之進退悉顛倒於其手伴食者承意指之不懈間有賢輔卒蒿目而不能救初領五都督府者皆元勳宿將軍制肅然成祖永樂間設內監監其事猶不敢縱沿習數代勳戚紈袴司軍紀日以隳毀既而

內監添置益多邊塞皆有巡視四方大征伐皆有監軍而疆事遂致大壞明祚不可支矣

南京官自永樂四年成祖往北京置行部尚書備行在九卿印以從是時皇太子監國大小庶務悉以委之惟封爵大辟除拜三品以上文武職則六科都給事中以聞政本故在南也十八年官屬悉移而北南京六部所存惟禮刑工三部各一侍郎在南之官加南京字於職銜上仁宗時補設官屬除南京字英宗

正統六年定制復如永樂時至神宗萬曆三年二月
詔南京職務清簡官不必備先朝有一人兼掌六部
者以後員缺如非緊要不必一一推補

太祖洪武二十六年三月以諸司職掌頒示中外

先是帝以文武官職名沿革品秩崇卑勲階升轉奉
祿損益歷年滋久屢有不同無方策以著成法恐後
之蒞官罔知職任政事施設之詳乃命吏部同翰林
院儒臣倣唐六典之制自五府六部都察院以下諸

司凡設官分職之事類編為書名曰諸司職掌至是告成詔刊行頒布

惠帝建文元年二月更定官制

帝初即位即省併州縣革冗員至是復定官制

升六部尚

書正一品設左右侍中各一人位侍郎上諸司去清吏字改戶部為民度支金帛食度四司刑部為詳憲批議職門都官四司罷左右都御史設都御史一人副都御史各一人又改都察院為御史府設御史大夫革十三道置察院一定御史二十八人改諸御史為拾遺補闕改通政司為寺通政使為卿左右通政為少卿參議為寺丞增置左右補闕左右拾遺各一人復大理寺改為司其卿為大理卿左右寺正為

都評事寺副為副都評事司務為都典簿太常寺改
卿為太常卿少卿寺丞分左右天壇祠祭署為南郊
祠祭署泗州祠祭署為泗濱祠祭署宿州祠祭署為
新豐祠祭署孝陵置鍾山祠祭署及司圓所增神樂
觀一人光祿寺改卿為光祿卿少卿寺丞如太常省
署丞二人增監事二人太僕寺改卿為太僕卿增典
廐典牧二署以驢騾十五羣遂生三羣分隸之詹事
府增少卿寺丞各一人賓客二人又置資德院設資
德一人資善二人其屬贊禮贊贊書著作郎各二人掌
籍典簿各一人國子監升監丞為堂上官增司業二
人省博士學正學錄增助教為十七人鴻臚寺改卿
為鴻臚卿少卿寺丞如光祿并行人司於鴻臚寺翰
林院增學士承旨一人學士一人設文學博士二人
省侍講侍讀學士置文翰文史二館文翰館設侍書
改中書舍人為侍書文史館設修撰編修檢討又改
謹身殿為正心殿設學士一人罷華蓋文華武英三

殿文淵閣東閣大學士各設學士一人特設無定員
文淵閣設典籍一人六科罷左右給事中改中東西
南北城兵馬司指揮司為五城兵馬司指揮副指揮
為兵馬副兵馬始置京衛武學教授一人啓忠等齋
各訓導二人布政司草左右布政使設布政使一人
改提刑按察司為十三肅政按察司廣東鹽課司為
都轉運鹽使司罷北平山東河南山西陝西五省及
江北學校貢士草五府左右判事官五軍斷事官司
增親王賓輔二人伴讀伴講伴書各一人長史一人
左右長史各一人審理正典膳正奉祀正良醫正典
資正並去正字審理副等改為副審理等郡王賓友
二人教授一人記事二人直史一人左右直史各一
人吏目一人典印典祠典禮典饌典樂各一人典儀
二人引禮舍人二人儀仗司吏目一人賓輔三伴賓
友教授進對侍坐稱名
不稱臣見禮如賓師
成祖入立俱復洪武舊制存

大理寺不設斷
事官及斷事司

神宗萬曆九年正月汰在京諸司冗官

先是倉場總督戎政協理以本部侍郎帶管皆不另
設協理京營兵部尚書楊兆疏辭協理帝命供職候
裁因勅裁草在京冗濫各官至是吏部議裁各衙門

官

戶部主事二十一員禮部主事三員鑄印局副使
一員兵部郎中二員主事三員刑部主事一員工

部郎中員外主事各一員雜造局大使一員都察院
司獄一員通政使司右通政二員大理寺左評事一
員順天府通判一員都稅司正陽門分司各副使一
員國子監助教四員學錄一員太常寺博士一員協

部郎中員外主事各一員雜造局大使一員都察院
司獄一員通政使司右通政二員大理寺左評事一
員順天府通判一員都稅司正陽門分司各副使一
員國子監助教四員學錄一員太常寺博士一員協
律郎一員贊禮郎五員司樂十二員光祿寺典簿一
員大官署署丞一員尚寶司司丞一員上林苑監蕃
育署良牧錄事各一員未補給事中戶科四員禮
科二員兵科五員刑科四員中書舍人二員行人司
右司副一員行人五員詹事府錄事一員因言去弊
貴果更化宜漸應裁官員若盡令同籍守候計二三
年除補方畢不無向隅之悲合令照舊在任供事待
有陞遷事故原缺停補詔嗣後有缺每三員以二員
儘候裁者填補務在一年
之內盡數補完餘如所請

官數

宋理宗寶祐四年九月監察御史朱熠請汰冗官二萬四千餘員

熠言景德慶厯時以三百二十餘郡之財賦供一萬餘員之俸祿今日以一百郡之事力擔二萬四千餘員之冗官欲寬民力必汰冗員帝納焉

臣等謹按馬端臨考宋之官數至寧宗嘉泰元年通四選共三萬七千八百餘員較前此僅一萬餘員則所謂冗者多矣又王圻續通考載帝淳祐時許應龍奏進故事畧曰今日之官其冗尤甚倅貳添差大藩方置今則或創於列郡議幕優閒絕無

職掌今則或增為兩員諸司之屬添辟無已制領之官同正並置不釐務者或給正官之俸創窠闕者多徇親故之私至若軍功尤為泛濫不歷行陣以議事為名而推賞初無寸功乃倖冒得官而注闕若左選入仕自有成式不應升等者妄冀升等法當待劾者求免待劾試銓不中則增年而注授京削尚欠則減員而改秩自陳勞績未經敷實而濫叨遷秩牽合獎利巧於經營而苟獲循資僥倖

之門既開奔競之風滋熾貪位慕祿誰無倖得之心毀法為通通啓無厭之請惟為政者斷以至公律以定法則宛轉營來者自然息念矣

遼官數無考

臣等謹按百官志始分南北院後又分北南面而凡所設官第列其名不紀其數如北南院之有樞密宰相等官名約一百一十有奇北面之御帳著帳等官名約一千五百有奇南面之朝官京官等

官名約八百有奇而員數俱未詳焉又志載六部

職名總目亦不詳員數所可見者尚書則為吏部

聖宗開泰元年吏部尚書劉績侍郎則為兵部工部

興宗重熙中兵部侍郎李

濟穆宗朝累

遷工部侍郎郎中員外郎則為禮部

道宗大安末劉輝為禮部

郎中興宗開泰五年又有虞部

聖宗統和九年虞部郎中崔祐諸

曹郎官未詳豈當時六部設官亦各有異同耶又

考南面官僚吏兵刑有承旨戶工有主事書省

無禮部別有戶部使司又劉涇嘗為禮部尚書而

庫部虞部倉部員外皆嘗出使司農別有卿散見於諸處興宗二十年十一月命東京留守司總領戶部內省事蓋皆自太宗入汴後仿唐官制設之而其員數多寡則不可得而詳考矣

金世宗大定二十八年任官一萬九千七百員四季赴選者千餘歲數監差者三千

章宗明昌四年奏周歲官死及事故者六百七十新入仕者五百一十見在官萬一千四百九十九

內女直四

千七百五員漢人六
千七百九十四員
至泰和七年在仕官四萬七千

餘四季部擬授者千七百監官到部者九千二百九十餘則三倍世宗之時矣

臣等謹按帝紀泰和四年五月汰隨朝冗官而七年官數尚三倍於世宗時若宣宗興定元年正月庶官必更冗於前故又令議減庶官冗員焉且其時設彈壓官招賢所經畧司提控司捕盜使砦長副及隨處設行六部東西南三路設行三司增置

紛紛冗濫可知矣

又按百官志內命婦有妃五人嬪九人世婦二十
七人御妻八十一人宮人女官三百八十八人皇
后位下女職九人此又在庶官官數之外者也

元世祖至元三十年官府大小二千七百三十三處隨
朝二百二十一員萬六千四百二十五隨朝千六百八
十四

是歲天下路府州縣等共二千三十四路一百六十

九府四十三州三百九十八縣千一百六十五宣撫
司十五安撫司一寨十一鎮撫所一堡一各甸部管
軍民官七十三長官司五十一錄事司百三巡院三
元紀事本末曰世祖時趙天麟上言國家立制自
宗王及國王郡王國公以下為爵自特進崇進至
將軍大夫校尉郎為階自正一至從九為品掌典
當行為職各職所居為位各位養廉之資為祿各
司贊佐行文之史為吏其制亦已詳矣然京師不

急之司院無用之局署及隨朝臺省部院以下諸
有司官吏可兼而不兼可併而不併者有之矣畿
外行省隨省諸有司宣撫廉訪等司路府州縣倉
庫局監諸衙門官吏亦有冗者武臣萬戶所管不
滿萬人千戶所管不滿千人之類亦有之臣竊以
冗官之大弊有三一曰選法之弊二曰政事之弊
三曰軍民之弊夫文武官吏員數既多當考滿之
時近春秋之選資格之簿擾攘紛紛保薦之文交

錯旁午有司行文猶且未暇奚暇顧孰果有才孰
果有德而考校之哉既不遑考校則取準於文籍
薦書之所陳布已耳於是雜流之途進貨賂之門
開遂致員多闕少無如之何經營者早得遷除養
高者坐淹歲月此選法之弊也夫文武官吏人數
既多有當決之事而不決有當行之政而不行問
其職則曰我職也問其施為則曰僚屬非一豈我
所能獨主及朝廷聞之遂立稽違期限之罰不亦

晚歟此政事之弊也國家用人路廣浮濫得升使
臨蒞在下必不能敷政化而刻剝之苦役使之煩
為害良多此軍民之弊也三弊不絕而徒立法以
防之不知法立而懼法之人奸欺之計益生矣伏
望察此三弊凡內外不急之官吏無用之衙門可
罷者罷之可併者併之然後以慎重名器之法擇
人而用又以黜陟幽明之法順理而考則典選者
易見其人易程其效而選法清矣臨政者事有所

歸職有所主而政績成矣在下者省於煩役免於苛刻而民業定天下自太平矣

臣等謹按帝紀世祖至元九年十二月詔諸路府州司縣達嚕噶齊管民長官兼管諸軍鄂囉十三年十一月併省內外諸司十五年六月詔汰江南冗官江南原設淮東湖南隆興福建四省以隆興併入福建其宣慰司十一道除額設員數外餘并罷之仍削去各官舊帶相銜罷茶運司及營田司

以其事隸宣慰司罷漕運司以其事隸行中書省
各路總管府依驗戶口多寡以上中下三等設官
從淮西宣慰使昂吉爾言也時又命平章政事赫
伯等諭中書省樞密院御史臺翰林院及諸南儒
今為宰相宣慰及各路達嚕噶齊佩虎符者俱多
謬濫其減汰之十八年閏八月勅中書減執政及
諸司冗員十九年二月減省部官冗員五月去江
南冗濫官六月詔阿哈瑪特濫設官府二百四所

存者三十三餘皆罷二十年正月右丞相和爾果
斯言阿哈瑪特專政時衙門太冗虛費俸祿宜依
劉秉忠許衡所定併省為便從之二十二年五月
中書省言六部官冗甚可止以六十八員為額餘
悉汰去詔擇廉潔有幹局者存之二十三年七月
銓定省院臺部官詔諭中外裁定之數詳見各門其餘諸衙
門並委中書省斟酌裁減三十年正月命中書汰
冗員凡省內外官府二百五十五所總六百六十

九員成宗大德七年二月詔中書省汰諸有司冗員仍令諭樞密院除出征將帥外掌署院事者定其員數以聞武宗至大元年十一月中書省言世祖時省院臺及諸司皆有定員後畧有增者成宗已嘗有旨併省邇者諸司遞升四品者三品三品者二品二品者一品一司甚至二三十員事不改舊而官日增請依大德十年已定員數冗濫者從各司自與減汰衙門既升諸吏止從舊秩出官果

應例者自如選格從之九月詔諭左丞相三寶努等去歲中書省奏諸司官員遵大德十年定制濫者汰之今聞員冗如故有不以聞而徑之任者有不奏而擅令之任者並逮捕之續弘簡錄載世祖二十三年詔有云日益月增官冗人濫良不誣也厥後屢勅裁減則其數繁多槩可知矣

又按通鑑順帝至元六年十二月罷文宗增置官屬初文宗設大禧宗禋等院及奎章閣藝文監增

置官屬有差至是大臣議悉革罷翰林學士承旨
庫庫曰民有千金之產尚設家塾以延館客堂堂
天朝一學堂乃不能容耶帝然之改奎章閣為宣
文閣藝文監為崇文監餘悉罷之此亦闕乎官數
可按冊而稽者也

明内外官共二萬四千六百八十三員

京師一千四百十六員南京五百五十八員在外二

萬二千七百九員

初凡宮官一百八十七員女史九十六員永樂後所
存者惟尚服所領司四而已

明史左鼎傳曰景泰四年御史左鼎言國初建官
有常近始因事增設主事每司二人今有增至十
人者矣御史六十人今則百餘人矣甚至一部有
兩尚書侍郎亦倍常額都御史以數十計此京官
之冗也外則增設撫民管屯官如河南參議益二
而為四僉事益三為七此外官之冗也天下布按

二司各十餘人乃歲遣御史巡視復遣大臣巡撫
鎮守夫今之巡撫鎮守即曩之方面御史也為方
面御史則合衆人之長而不足為巡撫鎮守則任
一人之智而有餘有是理耶乞將內外官凡非洪
武之舊者參酌裁罷庶民力可紓國用可省委任
專而事功可立帝頗嘉納

經世實用編載孝宗時徐恪請裁河南冗官疏曰
我朝法古建官凡在外官司府州縣等皆量地方

廣狹政務繁簡命官分治各有定額今日地方人
民無異於曩時錢糧軍需無加於舊額夫何添設
撫民督糧兵備水利理刑提學管屯營礦管河勸
農捕盜等官比舊加倍且設官分職皆為民也今
以撫民為名其餘各官獨不以撫民為職乎河南
以區區八府州之民既添設按察司管屯僉事兼
管撫民而布政司撫民乃用參政其為冗散不言
可知祥符等七縣添設主簿皆以修治沁河為職

今黃河北徙與沁合流由汴達徐滔滔無阻所設
各官似亦冗閒又如布政司職掌錢糧分守官自
合催督今既添官督糧分守官所幹何事按察司
職掌刑名分巡官自合問刑今既添官理刑分巡
官所幹何事況一官之來有一官之費食有俸糧
居有廨宇分毫皆取給於民且如參政一員皂隸
十名每名必得三四十丁馬夫十戶每戶必得三
丁通計不下四五百丁俱於殷實之家僉充其一

應科差不免累及貧難下戶出辦以一官言之似無大費以司府州縣官統計之其費何可勝言乞勅通查天下司府州縣近年以來添設官員若干何者存留何者革去從長斟酌則官無濫設民不騷擾矣

臣等謹按明實錄永樂二年六月成祖以吏部所錄中外官數比舊額增數倍諭令諸司悉汰冗官尚書蹇義等言在京各官近因事繁額外添設宜依定

制選留餘並送部別用在外大小衙門亦有多設者宜令所隸上司嚴行考覈宣宗宣德三年四月義等奏諸司官員近因營造收運等事內添郎中主事外添參政參議同知通判縣丞等官職事無常難行考察今擬在外除馬政農務外餘依舊制裁革在京從堂上官斟酌去留不許冗濫其內府各監庫郎中員外主事亦非額設俱裁革之英宗正統四年七月行在戶部等衙門各汰郎中等冗

官八十員送部改用其老疾官六員致仕憲宗成
化二十一年二月尚書尹旻等言京職額外增多
及傳奉升授匠官等通計二千餘人宜如正統四
年放還冗官例放回待缺匠官留其藝精者餘並
革之於是吏部奏汰四百五十四人兵部奏汰二
百一十人二十三年十月孝宗已即位從吏科給
事中王質等言吏部奏汰傳升文職帶俸右通政
任傑等五百六十四人禮部奏汰傳升僧道官二

百五十三人。工部奏汰傳升匠官工部右侍郎蒯
綱等一千三百七十人。各降斥有差。武宗正德元
年三月，以孝宗遺詔汰傳奉官七百四十六人。神
宗萬曆九年正月，汰在京諸司冗官九十五人。王
圻所載內外官數，蓋指神宗時言。當又在九年正
月以後。然也。明葉春及綱齋集有云：蘇轍謂害賦
者三：一曰冗吏。吏之冗者，雖更僕未易數也。一學
教官必三五輩，盡削訓導三四千員，可歲省十二

三萬天下武職踰十萬人五倍於昔竭膏脂以養
罷駕非計也宜嚴賞功之格重比試之令使官不
可輕得其已官者軍政治事乃支全俸額視職掌
而止帶俸者十三給之有罪科斷如律開國功臣
不失爵位亦止數公耳此何功德哉五倍之羨奚
啻數百萬也初建北京惟設行部分列六曹後既
定都南京諸司仍而未革投閒養望乃以居之愚
以為守備外並宜裁罷比於中都特為雄勝亦足

以控制東南莫安陵寢矣況其俸幾二十萬斟酌
裁罷則所省豈鮮少哉合而觀之可知官數之冗
濫矣

欽定續文獻通考卷五十一